



Na osnovu člana 22. Statuta Brčko distrikta Bosne i Hercegovine ("Službeni glasnik Brčko distrikta BiH", broj 3/07) člana 45. Poslovnika Skupštine Brčko distrikta BiH – prečišćeni tekst ("Službeni glasnik Brčko distrikta BiH", broj 11/03 i Naloga supervizora od 8. maja 2007. godine („Službeni glasnik Brčko distrikta BiH“ broj 14/07) Skupština Brčko distrikta BiH na 63. redovnoj sjednici održanoj 31. januara 2008. godine, donijela je

KODEKS PONAŠANJA ZASTUPNIKA SKUPŠTINE BRČKO DISTRIKTA BiH

I. Uvod

Svrha i cilj Kodeksa ponašanja zastupnika Skupštine Brčko distrikta BiH (u daljnjem tekstu: Kodeks) je da se ustanove norme ponašanja koje prihvataju izabrani predstavnici u toku izvršavanja svojih dužnosti.

Zastupnici Skupštine Brčko distrikta BiH (u daljnjem tekstu: zastupnici) smatraju da je u interesu svakog od njih pojedinačno, kao i kolektiva, da opravdaju i potvrde povjerenje građana u njihov integritet kao pojedinaca i u Skupštinu Brčko distrikta BiH kao instituciju. Da bi se došlo do ovog cilja, zastupnici u svakom trenutku moraju biti posvećeni općem interesu građana.

II. Univerzalna načela

Za vrijeme trajanja mandata zastupnici će se pridržavati sljedećih univerzalnih načela ponašanja:

- **Nesebičnost** – Zastupnici će obavljati svoju dužnost u interesu građana i Brčko distrikta BiH. Neće obavljati svoju dužnost radi ostvarivanja finansijske ili neke druge koristi za sebe, svoju porodicu, prijatelje i saradnike.
- **Integritet** – Zastupnici neće prihvatati finansijsku ili drugu nagodbu s licima ili organizacijama koje bi mogle zatražiti da lobiraju u njihovu korist.
- **Objektivnost** – U vršenju mandata, uključujući ostvarivanje zvaničnih kontakata, dodjele priznanja ili davanje preporuka za dodjelu priznanja i nagrada pojedincima, zastupnici se jedni prema drugima neće ponašati na način kojim bi se kršila opća načela ljudskih prava i trudit će se da poštuju različitost interesa.
- **Odgovornost** – Za svoje odluke i rad zastupnici su odgovorni građanima.
- **Otvorenost** – Zastupnici će biti što je moguće više otvoreni u svim radnjama koje preduzimaju i odlukama koje donose. Zastupnici će nastojati da omoguće pristup informacijama koje su od javnog značaja i izbjegavat će sukob javnog i ličnog interesa. Zastupnici neće odavati informacije koje su im date u povjerenju ili informacije povjerljive prirode bez odobrenja lica koje je dalo informaciju ili osim ukoliko ih na to obavezuje zakon.

- **Čestitost** – Zastupnici su dužni da se izjasne, ako kroz obavljanje svojih dužnosti ostvaruju lični interes i da preuzmu korake da riješe svaki sukob koji nastane, kako bi zaštitili javne interese, a u skladu s normama i procedurama koje su na snazi i koje se primjenjuju u Brčko distriktu BiH.

III. Opća pravila ponašanja

Stav Skupštine je sljedeći:

1. Zastupnici će poštovati Ustav Bosne i Hercegovine, Statut Brčko distrikta BiH i sve propise Bosne i Hercegovine i Brčko distrikta BiH.
2. Zastupnici se u javnosti moraju ponašati primjereno, prikladno i etično i istovremeno obavljati dužnosti po svojoj savjesti i isključivo za dobrobit Brčko distrikta BiH, njegovih građana i Bosne i Hercegovine.
3. U vršenju svog mandata zastupnici ne smiju stavljati vlastite interese ispred općih interesa.
4. Zastupnici su odgovorni svim građanima Distrikta. Stoga, zastupnici treba da održavaju redovne kontakte s građanima kako bi saznali s kojim problemima se susreću i da zajednički procijene posljedice sprovođenja odluka koje je donijela Skupština.
5. Zastupnici će uvijek služiti općem interesu i suzdržavat će se od svakog ponašanja kojim mogu ugroziti svoj i kredibilitet Skupštine. Zastupnik je dužan da se ponaša na način kojim će očuvati i pojačati povjerenje građana u integritet i efikasnost Skupštine.
6. Za vrijeme trajanja mandata, zastupnici neće koristiti svoj status zastupnika na neodgovarajući način, kako bi za sebe ili bilo koje drugo lice pribavili ili osigurali neku korist.
7. Zastupnici će demonstrirati djelotvoran pristup u rješavanju problema. Zastupnici će imati na umu da predstavljaju primjer stanovnicima, poslovnim ljudima i ostalim biračima koji učestvuju u javnim raspravama. Svojim primjerom moraju pokazati kako osobe različitih stavova mogu naći zajednički jezik i potražiti kompromis koji je od koristi građanima Brčko distrikta BiH u cjelini.
8. Zastupnici će nadležnim institucijama prijaviti bilo kakav pokušaj korupcije, pritiska ili neodgovarajućeg uticaja trećih lica koji je usmjeren na njihov rad.
9. Zastupnici neće primati poklone i koristiti usluge na osnovu kojih bi prekršili važeće odredbe Zakona o sukobu interesa i ostale važeće zakone.

IV. Posebna pravila ponašanja

Stav Skupštine je sljedeći:

1. **Zastupnici će poštovati dignitet ostalih zastupnika** – Zastupnici će se jedni prema drugima odnositi s poštovanjem i suzdržavati se od svake primjedbe kojom se narušava njihov integritet i dobar ugled.
2. **Zastupnici će poštovati ličnu privatnost** – Zastupnici će poštovati privatnost osobe koja je pružila informacije, osim ukoliko postoje zakoniti razlozi ili javni interes da informacije budu dostavljene nadležnim institucijama.
3. **Zastupnici će prijaviti interese** – Zastupnici su dužni prijaviti sve finansijske, lične i ostale interese koje imaju, a u skladu s važećim zakonima kojima je regulisana ova materija. Svako neprijavlivanje interesa, davanje pogrešnih ili netačnih podataka treba sankcionisati.

4. **Zastupnici će poštovati različitosti** – Zastupnici će doprinositi stvaranju radne sredine u kojoj je svako tretiran s poštovanjem i dignitetom, bez obzira na spol, spolni identitet, seksualnu orijentaciju, rasno ili etničko porijeklo (koje obuhvata boju kože, rasu, nacionalnost, nacionalno ili etničko porijeklo), vjeru, vjersko ili slično filozofsko uvjerenje ili njihovo nepostojanje, invalidnost, životnu dob, članstvo ili aktivnost u sindikatu, bračni status i stalni ili privremeni radni status.
5. **Zastupnici će poštovati druge u obavljanju dužnosti** – Zastupnici smatraju da svi zaposleni imaju pravo da budu tretirani s poštovanjem i da je uznemiravanje u potpunosti neprihvatljivo. Zastupnici će spriječiti bilo koji vid uznemiravanja i preduzet će sve korake kako bi ga zaustavili ili spriječili.
6. **Zastupnici će omogućiti neometan tok zasjedanja i sastanaka** – Zastupnici će ozbiljno i s dobrom namjerom pristupati radu na zasjedanjima i sastancima. Rasprave među zastupnicima tokom zasjedanja odnosit će se na temu o kojoj se raspravlja. Zastupnici mogu međusobno razgovarati radi konsultacija samo ukoliko se time ne ometa tok zasjedanja ili sastanka.
7. **Zastupnici će se ponašati profesionalno tokom zasjedanja ili sastanaka** – Stav zastupnika je da teška pitanja, uporno pobijanje određenog stava, kao i kritikovanje ideja i informacija predstavljaju dozvoljene elemente slobodne demokratije na djelu. Zastupnici će poštovati različitost u mišljenjima i idejama iznesenim tokom skupštinskih rasprava.

Zastupnici će poštovati zakazano vrijeme održavanja sjednica u određenom terminu, kao i vrijeme određeno za pauze.
8. **Zastupnici će spriječiti i osuditi govor mržnje** – Stav zastupnika je da je neprihvatljivo svako ponašanje kojim se podstiče na mržnju, netoleranciju i nasilje.
9. **Zastupnici će osuditi i spriječiti uvredljivo ponašanje** – Stav zastupnika je da je neprihvatljivo svako uvredljivo ponašanje i govor.
10. **Zastupnici će poštovati ulogu predsjedavajućeg Skupštine u održavanju reda** – Zastupnici će poštovati nastojanja predsjedavajućeg Skupštine da usmjeri raspravu na tačke dnevnog reda. Ponašat će se u skladu s Poslovníkom i uvažiti činjenicu da primjedbe na rad predsjedavajućeg treba da budu izrečene na uljudan način, argumentovano i u skladu s prihvaćenom parlamentarnom procedurom.
11. **Zastupnici će se suzdržavati od:**
 - *Upotrebe mobilnog telefona* – Tokom zasjedanja i sastanaka zastupnici neće koristiti mobilni telefon. Zastupnici mogu kod sebe imati utišane telefone, a razgovore će obavljati van prostorija u kojima se odvija zasjedanje ili sastanak.
 - *Konzumiranja alkohola i hrane* – Stav zastupnika je da se alkohol i hrana neće služiti i konzumirati tokom zasjedanja.
 - *Pušenja* – Stav zastupnika je da treba obezbijediti zdravu sredinu za zaposlene i posjetioce i oni zagovaraju pravilo zabrane pušenja kako bi podržali evropski stav o zabrani pušenja na javnim mjestima. Zastupnici, zaposleni i gosti mogu pušiti samo u prostorijama u kojima je to dozvoljeno.
 - *Čitanje štampe* – Zastupnici neće čitati štampu na zasjedanjima i sastancima, osim u slučajevima kada žele da se tokom svojih izlaganja pozovu na naslove ili citiraju navode iz štampe.

V. Sprovođenje Kodeksa

V.1 Tijelo nadležno za sprovođenje Kodeksa

Komisija za sprovođenje Kodeksa ponašanja zastupnika Skupštine Brčko distrikta BiH (u daljnjem tekstu: Komisija), koju je imenovala Skupština Brčko distrikta BiH, nadležna je za sprovođenje Kodeksa.

Komisija je posebno radno tijelo Skupštine Brčko distrikta BiH čiji su članovi po jedan član svake političke stranke i predstavnici klubova nezavisnih zastupnika u Skupštini Brčko distrikta BiH.

Ovo tijelo donosi Poslovnik o svome radu.

V. 2 Žalbeni postupci

Građani imaju pravo i mogućnost pokretanja postupka za sve vidove povrede ovog kodeksa.

Inicijativa građana u pisanoj formi šalje se Komisiji i mora biti potpisana punim imenom i prezimenom s naznačenom adresom stanovanja podnosioca/podnosilaca inicijative.

Inicijativu građana u vezi s povredom Kodeksa razmatrat će Komisija u skladu s procedurama koje su predviđene njenim Poslovnikom o radu.

V. 3 Sankcije za povredu Kodeksa

Za povredu Kodeksa mogu se izreći sljedeće sankcije:

1. Usmena opomena;
2. Pismena opomena;
3. Smanjenje plaće ili naknade u visini do jedne polovine mjesečnog iznosa;
4. Novčana kazna koja ne prelazi iznos od dvije mjesečne plaće ili naknade.

Sankcije će se utvrđivati na osnovu težine povrede ili njenog ponavljanja.

Za lakše povrede Kodeksa izricat će se usmena opomena.

Ukoliko dođe do ponavljanja povrede ili do teže povrede Kodeksa izricat će se pismena opomena ili sankcije iz stava 1, tačke 3 ili 4 ovog pododjeljka.

V. 4 Podržavanje Kodeksa

Zastupnici neće sprečavati izvršenje bilo koje mjere koju izrekne Komisija.

Obaveza zastupnika je da, svojim radom, osiguraju promovisanje ovog kodeksa, kako u javnosti tako i u medijima.

V. 5 Objavljivanje Kodeksa

Kodeks će biti objavljen u «Službenom glasniku Brčko distrikta BiH» i na taj način će se osigurati njegova dostupnost javnosti.

Kodeks stupa na snagu 8. (osmog) dana od dana objavljivanja u «Službenom glasniku Brčko distrikta BiH».

Danom stupanja na snagu ovog kodeksa prestaje da važi Kodeks ponašanja zastupnika Skupštine Brčko distrikta BiH («Službeni glasnik Brčko distrikta BiH» broj 7/06).

Broj: 0-02-022-12/08
Brčko, 31. januar 2008. godine

PREDSJEDNIK
SKUPŠTINE BRČKO DISTRIKTA BiH
Prof. dr. Milan Tomić, s.r.